

## Lou cassadou (2)

Aquet cassadou n'ère pas brigue coum lous autes.. N'abè pas ni câs, ni sac à yibiè, e au loc d'ahuga lous perdigalhs de la lane, qu'arroudabe p'ous prats, oun debè pourtan sabé que nou riscabe pas de ha gran prése. Nou s'en anabe pas tapoc brigue francaméns. Abans de passa d'û prat à gnaute, que-s assegurabe que nou y èren pas arréns, que-s arrebirabe quoan entenè per d'arrè d'ét û mèrlou escapa-s en cridan, e qu'escoutabe, quoan entenè per dehéns dous tòhous, dus ou très gays qui-s esganurraben. Aquet cassadou, de segu, ne debè pas abé lou permis. Lou qui n'at abouisse pas credit qu'auré cambiat d'abis quoan l'abouisse bist gaha lous quoâte, au moumén oun dus yandarmes à chibau estén en bistes.

Coum n'abèn pas telaraques s'ous oelhs, qu'aboun lèu coumprés que lou qui hoeyè n'ère pas en règle dap la léy. Que-s digoun dus mouts tout biste e, l'û p'ou camî, l'aute p'ous prats, que-s preparèn à l'embarra. Nouste gouyat n'ère pas à l'ayse : qu'éy hère beroy d'esta cassadou, nou-n éy pas tan d'esta cassat. Lou fesilh à la mâ , que sautabe lous plèchs e lous barats, e que guignabe, ta-s encouradya ét medich, decap au bosc espés dou ras dou gâbe, oun s'y pot chéns danyè, hupa e atula d'ûe bouts truffèque, aquéts grans pandars de yandarmes. Més que-n ère loégn, deya que perdè l'abanse, e que bouhabe coum û betèt.

Embarrat d'û coustat, sarrat de l'aute, ne poudè pas ha de mench, se boulè atégne lou bosc, que de trauca ûe gran estenude de heuguère toute curte, oun lous chibaus poudè galoupa, coum sus û plâ de courses. Qu'arremassè en ét tout ço qui-u demourabe d'alét e de boulentat, e que-s hiquè à couërre tan biste, de qu'aurén dit que lous soûs pès nou toucaben pas terre. Més lous auts tapoc nou perdèn pas téms. Lou qui-s ère demourat au camî qu'anè sourti en plée heuguère e que gahè l'esbalans à bride abatude. Lou praubot qu'ère perdut, més que-s poudè lecha gaha chéns desounou : las chances ta cadû qu'èren trop desparières. Labets que-s sedou sus û turoun, e que lechè aproucha lous yandarmes, qui l'atulaben.